



Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

Suna peqqutaava, Ilaqutariinnermut, Kultureqarnermut, Ilageeqarnermut Naligiisitaanermullu Naalakkersuisup ingerlaannaq Inatsisartut ilisimatissimangimmagit, Danmarkip Namminersorneq pillugu Inatsit akerlilerlugu Naalagaaffiit Peqatigiit Innarluutillit pillugit isumaqatigiissutaat atortussangortissimagaa Kalaallit Nunaannut tunngatillugu tunuarsimaarallarani?

(Inatsisartuni ilaasortaq Niels Thomsen, Demokraatit)

Tunngavilersuut:

Innarluutillit pillugit Naalagaaffiit Peqatigiit isumaqatigiissutaat Danmarkip Kalaallit Nunaannut tunngatillugu tunuarsimaarallarani atortussangortippaa Namminersorneq pillugu Inatsimmut uniuuttumik.

Innarluutillit pillugit Naalagaaffiit Peqatigiit isumaqatigiissutaat assut tapersersornartippara, tamassumali allanngunngilaa, qallunaat naalakkersuisui assut ilungersunartumik kukkusimamma-ta, puigornikkut Kalaallit Nunaat tunuarsimaarfigisimanginnamikku.

Aamma taamatut ajuusaarnartigajappoq, Inatsisartut aatsaat massakkt paasitinneqarsimamma-ta, isumaqatigiissut atortussangortinneqarsimasoq Kalaallit Nunaannut atuutilerluni. Ilaqutariinnermut, Kultureqarnermut, Ilageeqarnermut Naligiisitaanermullu Naalakkersuisiq Mimi Karlsenip tamanna maj 2011-mili ilisimasimavaagoq aatsaalli septemberip naalernerani Inatsisartut ilisimatissimallugit.

Isumaqartoqarsinnaagunaraluarpoq, pisoq taamak ilungersunartigisoq pissutissaqalersitsisimasiaqaraluartoq Inatsisartunut paasititsinissamut minnerpaamilluunniit ataatsimiititaliamut susas-saqartumut.



Inatsisartunut paasititsinissamik pisussaaneq aamma peqquteqarpoq, Inatsisartut Innarluutillit pillugit isumaqatigiissutip Kalaallit Nunaannut atuuttuussusaanera pillugu siusinnerusukkut eqqunngitsunik paasitinneqarnikuusimangamik.

3. februar 2010 taamani Isumaginninnermut Naalakkersuisoq Maliina Abelsen § 36 apeqqummut imatut paasititsivoq:

”Tunngaviusumik Naalakkersuisut Naalagaaffiit Peqatigiit innarluutillit pisinnaa-titaaffii pillugit isumaqatigiissutip 13. december 2006-imeersup Kalaallit Nunaanni atuutilersinneqarnissaa illersugaraat. Isumaqatigiissutilli atuutsilinnginnerani annertuumik piareersarnissaq pisariaqarpoq. Taamatut sulinissaq Naalakkersuisut neriulluarfigaat. Taamaattorli isumaqatigiissutip qaqugu atuutilernissaa pilersaarutigineqanngilaq.”

Taamani Naalakkersuisuusup ilisimasinnaasimassanngilaa, paasissutissat Inatsisartunut apuunneqartut kukkusuusut. Kisiannili Naalakkersuisut kingusinnerusukkut ilisimalerunikku, Inatsisartut kukkusunik paasitinneqarsimasut, taava Naalakkersuisut pisussaapput sukkanerpaamik paasissutissiissutit aaqqissallugit.

Taamaattumik eqqumiiginarpoq, Naalakkersuisut aatsaat massakut, Naalakkersuisut pisumut ilisimannileqqaarneranniit ukiup affangajaa qaangiuttoq, alloriarsimasut Inatsisartunut ilisimatit-sissalutik.

Imminut aperisoqarsinnaavoq, Inatsisartut ilisimatinneqarsimassagaluarnerisut, Inatsisartunut ilaasortaq uani ataatsimiinnermi Innarluutillit pillugit isumaqatigiissuterpiaannut tunngaqqinnaartumik aaliangiiffigisassatut siunnersuuteqarsimangitsuuppat.

Apeqqut akeqquneqarput ullut suliffiit naliginnaasut qulit iluanni.